



ATASSUT

UPA14/50-1

Gerhardt Petersen

24.04.2014

Ujaqqanik pinneraasiassanik annikitsumik aatsitassarsiornermik tunngaveqartumik kalaallit ujaqqanik pinneraasiaannik avammut tunisassiornerup ineriartortinneqarnissaanut periarfissanik nassuiaasioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat ujaqqanik pinneraasiassanik kalaallit tunisassiaannik avammut tunisassiornerup akimmiffiinik periarfissaanillu aamma allaatiginniffioqquneqarpoq.

(Inatsisartunut ilaasortaq Aqqaluaq B. Egede, Inuit Ataqtigiit)

Pinneraasiassanik ujaqqanik aatsitassarsiornermik annikitsumik tunngaveqartumik kalaallit ujaqqanik pinneraasiaannik avammut tunisassiornerup ineriartortinneqarnissaanut periarfissanik nassuiaasioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut ATASSUT-mit imaattumik oqaaseqarfigissavarput:

ATASSUT-miit qularutigineqassanngilaq ujaqqanik pinneraasiassanik nunatta iluani nutattalu avataanut, nunatsinniik aallaaveqarluni ajornangippallu inereerlugit tunisassiarineqarnissaannut alloriaqqikkusunneq ATASSUT-miit tamaviaarutigissagatsigu.

Taamatut ATASSUT-miit oqaaseqarluta siunnersuuteqartoq Aqqaluaq B. Egede, IA siunnersuutaanut matumuuna tapersiilluaratta, tassanngaannillu qilanaarluta Naalakkersuisut innutaasunik ujaqqanik pinneraasiassanik avammut niuersinnaanermut aqutissiuusseqataanissaannut isumalluaateqalernerulissagatta, siunissamullu nunatsinni innuttaasunut kinguneqarlualernissaa angutserlugu ATASSUT-miit peqataassaagut, tassuunakkummi ujaqqanik pinneraasianik avammut niuernermi nunatsinni nammitsinnik ingerlassinnaasariaqaratsigu, taamatullu ingerlatsilerumaartussanut iluanaarutaallualerumaarnissaannik siunnersummut neriuuteqarluta tapersiivugut.



ATASSUT INATSIARTUNI

Ilanngullugu ATASSUT-miit Pingaernerpaatut isigaarput nunaqavissut tunisassiorsinnaanerat misilittagalinnillu peqateqarluni, suliffiit aningaasarsiorfiillu ataavartut pilersinniassallugit angusaqarniarnissarput.

Naggataatigut ATASSUT-miit suli ersarinnerusumik nunatsinni paasissutissinneqarsinnaaneq ujaqqanik erlinnartuutitut pisanik pinnersaasiassatut aammalu avammut niuerutiginnissinnaanermut aqqutissiuunneqartarnerunissaannik ullumikkornit suli annertunerusumik nunatsinni siammarsaasarnerunissaq tusagassiiviit aqqutigalugu ingerlanneqartarnissai aamma kaammattuutigalugu inassutigissavarput.

Taamatut aaliangersimasumik ATASSUT-miit taperserlugu siunnersuuteqartoq Inatsisartunut ilaasortaq Aqqaluaq B. Egede-p qujaffigissavarput Naalakkersuisut nassuiaasioqqullugit Inatsisartut aalajangiiffigisassaattut siunnersuummik qaqitsimmat.